

獨

漉

堂

詩

集

獨漉堂集卷之十二

羅浮陳恭尹字元差

代汎亭坐月次白真人韻

一亭清夜月四面不同看竹密秋常駐天空夏亦寒燈
紅遙認寺江白不分灘追和仙人句千春得古歡

佟歸善德新招宴白鶴峯同王南區太守俞介石
別駕干連平南滇陳河源龔太史含五梁太史
藥亭方處士譽子季處士偉公

鶴峯清絕萬山呈却待坡公始得名江走穀紋來百里
帆懸斜照掠孤城當年旅寓聞鐘地此日華筵奏曲聲

不有能詩賢令尹祗應長揖禮先生

俞別駕介石招飲郡齋

從來佐郡稱多暇一遇詩人事事清
竹裏幽齋誰得到花邊新雨客能行
頻開美醞傳金盃坐聽嬌歌倚玉笙
昨日西湖同泛棹月明今夜在江城

登合江樓飲王使君南區寶坻酒次坡公韻

天地之交何固哉羅浮一合不可開
高樓西望且招手四百仙峯雲外來
醇醪足酹江山美杯杓未終長嘯起
登臨今昔幾千年坡公猶寓槎江水
前宵月盡昨宵新未必今人異昔人
明年荔熟醉何處爲報君家釀老春

柬于連平南滇索香海棠花

草木文章日以滋奇香美色盡於詩使君搜句窮天壤
異物嵇含尙未知

螢火如拳一樹光百花流出釀泉香山城路遠難身到
爲索秋風寄海棠

次答張亦姜

英年異骨總超羣況復清才絕衆芬筆下詞流稱倒峽
賦成人意欲凌雲取途自合先高足語勇何須問敗軍
曾作汨羅江上客巫陽招盡世誰聞

八法曾傳燕尾波老來漸負北山蘿空存匪石心難轉

何處懸厓字可磨劣蹟不堪驚子換新詩將付雪兒歌
歸舟異日池塘夢唱和終知別後多

次答連雙河送之歸湖南

羅浮四百共幽尋清籟曾將俗耳針抱朴久無仙吏跡
授書徒負老人心世間歲月馳駒隙絃裏宮商別鶴音
莫道楚南非遠道東西流水隔高深

次韻送陸蓬叟

比肩千里未云賒野寺扁舟送落霞無計畱君歸亦得
天南誰是魯朱家

送沈山隱入都

黃梅雨勢淹徂夏寶劍雲生光四射將軍自起拂拭之
手握雙龍舞中夜虎頭燕領立可飛南中畱滯將何依
看君才氣固落落一日百萬真能揮當筵談笑旣無敵
下筆千言纔頃刻只今海內總昇平遙微不妨還草檄
封侯前代幾書生萬里風雲自此行探穴舊傳班定遠
畱屯還紀趙營平

同林沂澤家貞其引眉諸子偶泊萬竹洲卽事

白首希閒日青尊共此航一洲風繞竹三宿月聯牀剡
棹非乘興仙舟異衆望無端成去住人世亦何常

送姚龍友嵯司

清風空滿越城陰，莫遂三年告養心。
屢賦白華歸未得，一行風木恨何深。
布帆無恙南江水，班馬長嘶北塞音。
聞說舊鄉今作郡，大材寧許久山林。

毛會侯小影

文章傳字內，早已見鬚眉。
豈謂丹青裏，居然白雪滋。
風雲行逸足，山澤想閒儀。
莫歎成樗散，千秋乃在斯。

送鄭珠江還都

嶺頭秋始至，江上葉先飛。
送子如流水，朝宗是所歸。
中途迎驛吏，到日換寒衣。
積雪金門外，吟詩亦掩扉。

告歸踰一紀，負土又云春。
至行推吾黨，離心況故人。
綠

尊連夜月青簡立言身努力方強壯無忘論著新

陳關部

中樞本自典選方近奉天書出建章八表同風歸有道
百蠻重譯總來王關河持節霜生戟尊酒論文士滿堂
欲頌九如稱壽兕新秋明月擬清光

送雲在青入都

如何萬里赴幽燕正是蕉黃荔熟天南海歌驪飛雨外
西風騎馬轉蓬前壯遊尙覺光生路舊識應驚雪滿顛
朝右近多交好在帝城雲日與畱連

過家開仲新齋因憶帆園舊游

宅邊開徑接疎籬步屨相過旦夕宜方沼紅魚春後子
平臺蒼樹古來枝忽看山色浮人外尙記名園隔水涯
伯叔父兄文酒會白頭猶夢舊追隨

立秋日冒雨過林立人因同潘子登許允臣飲羅
非黃喬梓山齋有作

肩輿不速赴高軒正喜新秋好晤言白帝來時風滿座
青尊開處雨翻盆卽飛玉露消殘暑誰瀉銀河洗厚坤
却爲吾儕畱重客未教舟楫返江門

秋夜同梁巨川盧儁斯過宿潘子登寓齋早起別
去與巨川登錦巖次子登韻

步履閒階月滿堂更浮香茗對幽篁人過中歲哀難寐
酒到深更醒亦狂竹榻夢迴餘舊淚絺衣朝起趁新涼
不堪共上高巖望江水迢迢似恨長

贈謝權部龍友

曾于三楚識文雄健筆翩翩大國風衡岳萬峯來紙上
洞庭千里入胸中含香粉署高天近奉使星槎絕域通
野老白頭環堵內干旌遙出粵城東

賀偉公舉子

照乘明珠出海波同人無不爲君歌詩書有此真堪託
清白遺之亦已多夫子文章終喻蜀鳳雛毛羽合巢阿

而翁莫道生兒晚見爾攜孫鬢未皤

題官文佐自畫小影

日難自見古空言畫裏丰神子自傳畫若比人人更壽
人雖百歲畫千年

嘉果開鄉與粵鄉滿盤堆出荔枝香年來闕下頻頒賜
未必山人獨自嘗

題錢鑑濤濯足圖

玉雪肌膚不着泥濯纓何處是清溪齊州九點非吾土
遮莫桃源在楚西

寄題姚雲望年伯新閣

近郭新開百尺樓諸峯如畫坐來收數聲疎磬鶴清唳
一曲溪光人白頭道有廢興唯自嘯心無馳騖不煩休
練江千里非難到擬酌黃花及好秋

次答家良可

同源千里卽同堂三世論交鬢已蒼舊德在人棠樹老
新詩貽我夜珠光文章得路聲華遠霄漢乘風羽翼長
計日黃金臺下路馬蹄看爾踏春芳

顧斌琬清琬兄弟過訪有詩兼攜其叔瑞長見貽
之作相示次清琬韻兼答瑞長

冷花疎竹閉閒亭煮茗烹泉自著經論長以吾爲一日

言詩期爾續先型溪山雪裏堪移棹兄弟行時合聚星
更頌烏衣三謝句幾人清逸得寧馨

送岑聖眉北上

少有文章老更成每從林下領諸生南溟不負搏風力
北路無嫌踏雪行雙闕晴時瞻紫氣五雲開日奏新名
君家舊德黃門在看爾飛揚繼直聲

送梁言配

言乘青雀舫又別白頭親不盡天涯路有方遊子身東
漸踰揭嶺西笑指咸秦正爾梅花節風霜亦慰人

送王誠軒中書

小禺山舍倚城根小種梅花別作村僻地豈堪過使節
野人唯有掃柴門初冬風雪迴征棹寸晷從容接晤言
嶺表舊家喬木盡後來桃李賴君繁

送程三水天翼內擢

操存不改舊書生幾載官衙飯菜羹小郭自臨三水上
十州同識獨清名俸錢每用填民歎坐舫時因送客行
我從能言言不盡口碑先已到神京

送潘受平暫歸江西省觀

來去慰高深梅花滿舊林客庭詩禮地歸夢祖孫心彩
服行常著春風到在今別懷何所惜爲爾發清吟

寄懷張寄亭太史

十二年前汗漫游，佗城杯酒共登樓。
榜名已自魁三象，物論還歸第一流。
內翰新篇傳北闕，先公遺樹滿南州。
懷中書札多時在，未敢因人造次酬。

黃明經俊胤年九十三猶赴闈試詩以壯之

七待春開便百年，少時朋輩幾人全。
猶爲場屋諸生帽，已謝朝廷養士錢。
老脚登山無萬仞，小書盈紙有千篇。
知君定是鷹揚老，黃石黃公未足傳。

程德基以所著易簡方編見惠謝之

黃山白岳足幽居，好學偏乘厯聘車。
千里借籌頻決勝，

一官搔首尚踟躕
稽含每狀南中物
抱朴兼成肘後書
安得藉君調燮手
盡迴元氣到比閭

王十洲學使以其高祖漢陂先生文集屬爲選定
賦此答之

前朝全盛紀成宏
盡掃繁音尙正聲
一代才華歸七子
三秦風雅屬先生
青霄史館新裁出
白首丘園健筆橫
司馬文章杜陵句
幾人兼得擅長名

高曾遺矩未云遙
三百年來德愈昭
遂有使星臨粵嶠
重將文體振興朝
千金呂覽誰增損
一閣藜燈久寂寥
竊記兒童時諷詠
山中如得聽簫韶

送楊寶生北上

一雪當年處士聲二毛今始慰平生科名於爾何增損
世俗居然有重輕鵬海浪高看直上燕臺路熟好安行
黃門奏賦君家事爲報時來羽獵成

贈胡防禦裕菴

朱門長是隔煙蘿之子由來意氣多花下相尋時立馬
月中畱燕每聞歌牙籤萬卷兒能讀白雪清篇手自和
爲說明年春向暖却歸蓬闕更鳴珂

春初送王新侯歸宜興王叔琬歸寶坻

竝轡非爲汗漫游燕吳萬里一歸舟大江中路分南北

五嶺重來定夏秋，冰下躍鱗桃浪細。
岸邊聞鳥柳風柔，詩家能事春唯甚。
篋裏新添是唱酬。

上元日邑侯徐戢齋招同余齊樞進士游允陵梁
殿一殿張余兼五廬聞仲嚴字長燕集青雲山
閣卽事賦謝二首

瓊樓香塢啓重重，老脚能登不借筇。
首月正逢相望日，華筵偏就最高峯。
山翔遠勢元名鳳，隄卧寒江別號龍。
山前有路俗名龍鬚繞郭新陰千萬樹，
縣人爭護大夫松。

佳辰況復奉清尊，郊外行春騎吹繁。
已播和風蘇物彙，佇爲膏雨灑乾坤。
依微浦樹分村落，斷續雲峯到海門。

曾是童年文社地白頭今日更何言

送陳嵩山觀察之任涼莊

玉門關外草蕭蕭萬里涼州路未遙
莫道書生無燕領邊人今識漢班超

曾於桑梓立奇功一策全教寇技窮
此去更搜囊底智希文兵甲在胸中

海不揚波蜃氣平十年南徼賴澄清
九重拊髀方西顧未遣荊州髀肉生

絲絲春雨越王臺別思如雲黯不開
白首尚堪扶杖在路傍重待節旄來

天藏禪師招同唐海門梁藥亭集雙桂洞

竭來猶古洞幽處有新軒石滑無人徑花深不二門帶
香分茗火經雨散苔根座是同心者都忘默與言

畱別吳智友

東風行處有花飛十日淹畱半雨霏燭下縱談時徹曉
山間追步亦忘歸沉深古學人皆仰坦直天懷世所希
最是先塋依此地春秋來往不相違

何孟門以足疾不能入邑積雨新晴戲此奉簡

我從修墓初歸里子又經春不到城雨歇尙畱深巷溼
月圓誰共小窗明卞和別後方售玉孫子贖餘好用兵

四海更無投足地未妨扶杖且徐行

次答林立人

乾坤吾道本悠悠久已忘機狎海鷗斯世自甘爲棄物
新詩何必話從頭東風正熟中山酒積雨宜披五月裘
幸是羣賢有嘉會蘭亭觴酌尙堪浮

雨中過林立人所寓許將軍署齋咏庭前英石

五峯西畔亞夫營一石中庭見者驚翠袖低昂如萬舞
紫雲飄舉欲孤行居然造物鍾全巧瘦絕誰人畫得成
不獨韓陵堪共語雨中高咏有羣英

東沈寶文

一雨江城動再旬酒杯頻共落花春我還故里如羈旅
君作嘉賓卽比鄰待價超騰千里足著書哀謝百年身
耄期若果符相許車笠毋忘問釣綸

題子登感懷示弟詩後并爲其尊人澹隱隱君壽
三峽山中有斷猿聲聲悽絕本何言從來至性無文字
一任人間自忖論

連珠五曜映高旻偕隱誰人得似君烏反舊巢元足養
鳳翔千仞更能文

鳳山驪歌十章送徐侯戢齋赴召入都

不得畱公更幾年絲綸前日下中天誠知王命行難俟

欲寫豐功世共傳

雙塢中間畫閣開一時桃李竝新栽雖云大邑無多暇
勝日頻能命駕來

谷風和暖好扶犁春後新苗綠總齊萬樹夾途畱雨氣
八橋臨水落虹蜺

郭外樵漁接水邨比年疏浚盡公恩家家有月歸來夜
小艇乘潮直到門

貴賤咸歸土一丘澤流枯骨賴賢侯劉伶醉後皆荷鍤
莊叟無從問髑髏

度海空傳漢伏波高橋重架石巍峩從前作者皆豪傑

事業曾吳孰較多

前令吳尚書廷舉曾禮垣仲魁先後建伏波橋竝膺優擢

心如明鏡挂當空廣漢何勞設
鉅筭百里生靈幾百萬
妍媸一一在胸中

吏才況是出魏科五十年來未見多
赤子豈知蒙帝力
白頭一老尙能歌

功在將來未易名九重今已徹
賢聲龍蛇劣筆何堪似
碑字因君滿帝城

百尺飛樓四面風新鐘遙出鳳城東
縣人此後思何極
曉夕聞聲便憶公

制府石公見招以在鄉不及赴越日謁謝

世有勲勞重公爲社稷臣鳳書來紫闕龍節到朱垠地
極三江永恩移六詔春纔緜增氣色魑魅避威神海以
無波貢川餘未效珍養心唯寡欲至德在安民持重山
爲令澄清古作倫棠陰皆陝召苗雨卽周郇雨浙稱慈
父中州現佛身去思存異地來暮幸躬親屢賦柔薇長
頻看偃草新星霜臣節著歲月國風淳一物皆霑被微
生況賤貧弓招承下及薪采偶逾旬光霽欣初視芻蕘
亦見詢白頭綺里季三祝華封人寬政容疎放生涯任
釣綸祗應與耆老擊壤咏深仁

有約惠州偶以事不卽往月夜獨坐奉懷王使君

子千三首

好溯東江水新晴月又圓灘高鳴盡夜山峭綠兼天昨
日數行札誰家百丈船使君應倚檻相望郡樓前
北牖開千嶂西亭領二湖舊題詩總在宿約日頻逾官
廨鄰仙島人居著畫圖此時稱兇後乘月想登艫
忼慨多奇氣人稱趙與燕看君名已遂於道守彌堅世
事增諸感詩才老去年從來不朽者柄鑿有方圓

次答晉江郭君章君章祖都憲介菴先生乙酉主
試吾粵先君列第七人先君殉節于丁亥先生
殉節于戊子先後贈大司馬君章以先生未歸

宦客來粵求助世舊之感情見乎辭

淪落俱爲患難家先賢遺澤徧江涯
端人相取濯孺子知己能伸鮑叔牙
兩地丹青畱碧血百年憔悴賦懷沙
尙存一息酬恩日未敢逢君說鬢華

輕暖輕寒不定天壁苔階草綠相緣窮
居閉戶無三月積雨凝陰又半年劍到
合時先見氣玉當埋處自生烟忠臣
宦客今猶未末俗能無一慨然

次答顧天石

第二泉清接慧山會烹僧茗慰愁顏
舊游似我他生事新句逢君五嶺間
老去漸防風括括春來長是雨潏潏

不緣蠟屐能相過蛛網柴門祗自關

辟疆文柄昔誰操睥睨會空一世豪南國舊家名父貴
東林壇坫異時高且藏白玉需良價莫厭緇塵上敝袍
積雨三城羈緒惡賦詩休遣夢魂勞

答朱彥則二首

雲間壇坫世同推之子南來慰所思白石砂牀勾漏客
清秋幕府杜陵詩句如初日斯爲美曲是陽春和自遲
咫尺端溪不謀面與君俱有鬢邊絲

民俗凋疲只願閒每飛符檄靖諸蠻著書名在千秋後
借箸功存五嶺間綺里芝榮誰共采蓋公堂迴杳難攀

何時邂逅崧臺月卮酒相從一解顏

送姚上寧歸潮陽

洗後高桐不染塵小池西畔草如茵十旬積雨愁嘉客
兩度離家媿主人龍劍飛潛原有數馬翁得失孰爲眞
三年看爾冲天羽萬里搏風慰老親

西湖送春次王紫詮使君韻十首時積雨八旬矣
四月朔日積雨偶晴故有此作寄余索和

一春飛電不停光誰縱羣陰共閉陽出谷野雲籠樹白
漫隄湖水入江長鶯辭青帝啼猶溼燕得晴天喜欲狂
想到六如亭下路屐泥封盡落花香

春來何處去何歸世上關心者亦稀老景漸知前路逼
新花應又一年違橋邊激激催流水塢外層層透落暉
深羨使君閒此日野人經月未開扉

借却今朝補昨旬

三月小盡

歷書新紀祝融神金烏落盡無

晴日蜀鬼啼哀有恨身星火尙傳羲叔宅簫韶曾是帝
虞巡從他節序相流易四百羅浮祇自春

欲送歸雲不可尋讀君詩句費沈吟春無白日常疑淺
水到滄溟未是深野竹生來饒苦節渚蓮開後見同心
最憐犀帶橋頭月他夕分明照客襟

菱花荇葉匝雙湖麗日曠曠百里鋪羲馭人應回北陸

澠池休恨失東隅，鷺羣逸少非無帖。顰鼻相如別有壚，
一咏一觴聊自足。好畱春鳥勸提壺。

青泥亭子石闌干，高塚累累照水寒。泉下朝雲何處所，
偈中如露未曾乾。蠅能遠道因隨驢，草有餘香不讓蘭。
試問錢塘蘇小墓，清明寒食幾人看。

己歇黃塘昨夜雷，寺南新築定曾催。花名躑躅春長發，
竹有龍葱手自栽。元凱勒銘傳在德，左司爲郡號多才。
千秋也是尋常事，日月行天似磨推。

青陽歸去不蹉跎，閏歲曾無一日多。柯斧爛時纔頃刻，
觸蠻爭處又干戈。餘生合付丹砂火，壯志其如白髮何。

阿閣鳳巢知在邇春來竹實滿前坡

千絲坐柳拂長隄纔見東風日已西蟻垤一春鳴老鶴
山童三月報新鷗將收蜂蠟供游屐欲積蚨錢買醉泥
首夏清和全未得朝來陰雨倍淒淒

莫道工詩遇必窮使君曾不問窮通千年自夢生花筆
一郡同歸偃草風杳杳郵筒來昨日堂堂旗鼓建晴空
風流宋玉今搖落誰和陽春入郢中

夏夜小酌秋舫齋前懸燈數十竹間竹密燈紅參
差高下殊有佳致因共賦之得間字

燈影高低萬竹間暫移尊酒一開顏杯浮夜色如邀月

風送涼聲似在山火樹近從南尉得燭龍遙自葛陂還
高齋秋氣長如此密笄當門且勿刪

同王紫詮使君自廣溯惠卽事四首時積雨百餘
日江潦驟漲數丈壞官私廬舍不可計使君奉

令發賑

積潦沈山足舟行此最難牽江無舊路崩石有新灘高
竝泉源湧平欺渤澥寬中流多器物不忍問人看

已息經旬雨猶逢飲澗霓水痕高在樹山色近看泥乳
燕歸無屋行魚戲滿畦農家棲未定不暇事畊犁

開處千檣集平時百貨來祇知江欲近焉念雨爲災歛

舍墻相枕殘邨瓦作堆無人思曲突更欲焰餘灰
豐歉誰無分風雷太不情聊隨發粟使偶作汎舟行江
雨珠爭躍山寒玉竝鳴一途新物色吟咏不成聲

立秋前六夕憶雪樓月酌卽事

良宵勝地一時兼南北軒窗盡捲簾風度竹聲涼細細
月搖江影白纖纖談當快處童偷笑酒到酣時客喚添
漸近清秋天似洗隔城遙出幾峯尖

送張畏菴進士歸吳門兼懷孫赤崖

雲霄羽翮正翩翩南北成名總妙年古蹟欲尋勾漏令
客程來自素馨田頻登郡閣山當檻竝醉湖橋月上船

閩國揚帆從此遠女牛星野早秋天

吾生白髮早蕭蕭故舊胥臺半已凋
庶下卽今聞舉案赤崖後寓吳門市中誰復憶吹簫
三冬湖橘初開樹八月江鱸漸上潮
挂綠比年風雨妬幾時林裏得相邀

送王子觀歸都門

北溟南海本同濤萬里遙遊興自豪
京輔舊家喬木古清秋歸路雁行高
攜回勾漏丹砂顆舞著虞廷黼黻袍
別後相思何處寄郎星天上望勞勞

九日東崔俞鵬

扁舟曬藥古誰同來往鄉城咫尺中
心力自行菩薩願

鬚眉元有逸人風，九還丹火看將熟。
七字篇章老愈王，家有菊坡遺本在。
願分新藁到衰翁。

送薛孝穆之乳源

羅浮遊興尚逡巡，又向雲門寄旅身。
歸計漸於吳下近，山光多與楚南鄰。
簫韶合觀來儀鳥，鍾乳偏宜服食人。
地僻古賢希到此，賴君文采發揚新。

夜坐又次諸公韻送孝穆

霜後滇江見底清，扁舟況復月華明。
天涵遠岫青無限，水寫新梅白未成。
五馬風流開祖餞，羣公詞賦贈將行。
支離自笑燈前影，掩戶高吟冷暈生。

時病足不能出送

送王立安偕若雲叔琬諸昆弟還惠州

去來同是著萊衣
豈必茲行遂日歸
浦上鴛鴦頻獨宿
天邊鴻雁且連飛
湖橋罷釣宵移棹
郡閣論文晝捲扉
病足漸堪驅策在
只應旬月暫相違

題王惠州紫詮使君觀瀑圖

一樹蒼松偃蓋深
高崖飛瀑落千尋
使君雅操清如水
不用臨流更洗心

不將筆墨對林巒
燕坐超然靜五官
老易本來無二道
河圖天一是金丹

曾宿田盤最上方
一麾頻歲駐羅陽
知君滋味嘗都遍

南北山泉孰較長

贈溫

永安新邑百年餘山峻泉高毓秀初賈傅妙齡將入洛
太真英略豈懷居庭趨詩禮聞金鐸策對天人拜玉除
雛鳳清聲非一日卽看雲駟上冲虛

送蔡尙之之瓊州讀書其兄肇之官舍

弟兄琴硯久相依復向官齋共掩扉春草池塘他夕夢
北風鴻雁一行飛香株有膽堪克珮柳子無心足慰饑
莫謂海天南盡處海公人物古來稀

題朱開黃望雲圖

寸草心孤日又春天涯何處不思親白雲北望三千里
猶憶西湖醉酒人

家住維揚廿四橋幅巾蘿帶好逍遙怪君詩思清無比
鶴骨稜稜在九霄

晤何慎思順德于珠江舟中率爾投贈

東風飛鳥早相聞一揖而今慰望雲千里故人勞問我
時致羨門音問五峯明月喜來君炎州地迴梅先白澤國冬殘
雪未零幸近樂郊聞善政舊居歸擬事耕耘

送李宁桓司訓高要

三策天人對玉除妙年司鐸受恩初江流遠接龍吟水

山郭遙開石室書，便著錦衣趨子舍。直將家學敎比閭，
門前咫尺南溟水。大翼如雲有化魚。

題家相如小影

礙日吟風萬竹青，有人高坐共談經。知君雅志思淇澳，
箴警猶勤衛武齡。

庭下聞詩共穉年，白頭頻見變滄田。浴沂春服依然在，
不爲方袍學說禪。

寄家鳳軒歸化令

不同杯酒幾經春，又見桃花刺眼新。黃綬去爲飛鳥客，
白頭家有倚閭人。音書非遠無金玉，嶺海分流隔粵閩。

一語嘉州君記取此鄉慎勿厭清貧

乙亥元日送石公汎海之交趾說法

銅柱西過不易攀却從海外出人寰孤舟獨坐如天上
高浪經行似雪山國有中邊同是岸道存彼此孰能關
東風好借扶搖力手散千花與八蠻

長洲張宗肅見訪別後有詩次韻奉答

生來憂患日觀交清固難居濁未消駟馬官迴窮巷轍
一枝真愧野人巢敢論方朔能肥遯差免楊雄更解嘲
載讀詩篇頻擊節白頭千里有神交

元夕寓梁壘符山館雨中同吳又札梁巨川談亂

離往事有作

銀燈玉笛漏沉沉半月江城總是陰
積雨在途行處滑
方池當檻坐來深
同聲賴有如蘭侶
把臂猶存舊竹林
池北卽寒塘故址
閉戶寂寥談往事
白頭悽斷百年心

送岑霍山之吳門

何期更作遠行身
已自甘心就隱淪
三楚舊游他夕夢
大江東去白頭人
休就杵臼依臯廡
好辦魚竿上富春
君善題詩無奈嬾
歸裝須許百篇新

賀鄒羽四司教順德

百里家林卽比鄰
一官猶是讀書身
青雲漸展鵬風翼

絳帳閒開鳳嶺春，特立文壇年尚少。
自磨雄劍氣彌新，尊君風義先型在。
深喜傳家有令人。

送王立安歸都門

細雨乍過春花燃，金臺歸客揚金鞭。
停鞭下馬人揖我，虬鬚飛動東風前。
長身玉面年殊少，直上彤墀應新詔。
丈夫出處合有時，看爾昂藏豈常調。
田盤山下好林臯，賢人隱處德星高。
八龍二方侍左右，文若長文卽爾曹。
自到炎州供子職，省覲頻年南復北。
尊君五馬駐羅浮，近復雙旌向梁益。
川南路比嶺南深，便擬輕裝度翠岑。
命兒將父勞，臣事中路畱家人。
客心天涯此別期，難定。

聊作枯吟爲君贈千秋志業爾自期白首蹉跎吾善病
三水別立安後同王使君八羚羊峽四首

三江燈火夜無眠舟楫分行向曉天獨挂東風更西去
川南燕北思綿綿

春陰連日雨重重不記舟行遠近蹤酒後捲簾風刮面
白雲堆裏認諸峯

峽山高峭月微明十里如牆夾岸行誰向中流喧爆竹
東西崖谷走雷聲

歸途不快打頭風緩棹乘流興未窮一片晴峰疎樹外
木綿新點兩三紅

寄鄭珠江

紀恩頻得讀新篇兩度聞緘益黯然梓里看春猶昨日
芸臺珥筆又三年漢廷內史名空籍家學康成世有傳
尊酒論文偏念爾從來無夢到幽燕

送家剛長之官儋州

莫歎離居水一方仲尼浮海興何長此心倘不殊千載
儋耳原來匪異鄉緇帙舊籤裝玳瑁清齋新麵進枕櫛
青春待擊南溟浪六翮搏風起越裳

寄陶昌化子師

五月羊城積陰雨如瀉陶侯之官未及境停車問我

禺山下貧家無酒畱君懽郊外移尊勞五馬相逢半是
白頭人高僧況有青蓮社紅樓朱榭次第開臨高可以
揮金杯石門香浦在左右龍川羊峽東西來陶侯胸中
富山水郭璞酈元邠足比文章詞語妙今時稽古寧知
更如此珠崖儋耳絕方輿勝蹟中華或未如天遣陶侯
分百里盡搜靈秘入新書別來著作今多少海外音書
阻魚鳥我從一跌落苔階卧疾羅浮過秋杪懷君終夕
寐難成聽盡賓鴻自北聲一笑相逢定何日因風聊以
贈平生

花朝後二夕何侯招飲署中卽事

清齋銀燭敞華筵
況值融和二月天
春得一晴花盡放
望連三夕月猶圓
中心自醉非酬酢
入耳仁聲勝管絃
吳下舊交今寂莫
因君重爲說當年

張肅宗以詩索予作書次韻答之

鳥畱趾爪皆成字
鳳得簫韶始集梧
劣跡敢云希世有
清音真信此時無
何心逝水偏多韻
不定行雲未可摹
天地至文原有在
莫將臨倣費工夫

梁虛齋園中木綿次韻

太華十丈幾曾花
今見南州野老家
近院似歸金蠟炬
倚山如出石牀砂
每來丹鳳巢三月
未許銅瓶折一丫

便是天台最深處賦才何讓赤城霞

題采飲山人耦耕圖

飲犢於上流洗耳猶爲汙采薇而食之西山乃周土昔
賢立人極以作狂瀾柱制行豈不高厥躬亦云苦何如
扶犁翁日以牛爲伍睥目睚其腹不聞復不覩采山而
飲河安問今與古

祝張文宿邑丞

幾載清齋對鳳城一官仍是老書生折腰祿米纔盈斗
沸耳山泉過半鑪霜後閒階猶草色公餘終夕有吟聲
木綿花發紅如錦羔酒躋堂見物情

送朱開黃歸揚州省觀

衰殘無意事
翺翔送子歸
飛見雁行半
載共居忘主
客
三春分袂異
行藏將尋巴
峽添新咏先
度梅關問舊
鄉
滿挂南風趨
子舍煙花多
處是維揚

贈秦番禺子芳

疎壑行趨暖
新苗漸得霖
俗依仁政久
春與縣花深
家
學時光大君
恩日照臨卽
看徵卓魯絕
勝貢璆琳
安堵間閭足
幽棲歲月長
席門貧負郭
蓬鬢老多霜
每
枉干旌過頻
承聆睠光未
希嚴僕射只
愧浣花堂

次答宋幼琳

長貧今白首天地豈吾私本絕寰中慕將深塵外期高
歌來上客好德是天彝愧乏驂驪質徒虛伯樂知

送王紫巖

頻年傷遠道此別更難任我守枯株老君懷寸草心采
芝羅岳峭釣鯉洞庭深未有前期在相思空好音

次答溫杜公

列子能風御騷人好遠遊重爲萍梗汎應以荔枝畱中
宿潮南落雙江水北流雖云隔千里轟轟萬峯稠
病來猶荷鍤老矣欲如何手種一叢竹清風時自過隱
囊隨散帙高轂隔垂蘿誰肯尋幽僻門前野草多

各抱先臣痛龍髯不可攀杞人天果隕桑者日無閒舊
血傳心碧新霜點鬢斑卽今無隱逸何處買青山
身世交相棄形骸亦自嫌其堅同大瓠於用媿輕嫌世
德君家重清詩律法嚴無能酬麗藻搔首對窮檐

題王也癡虛舟三首

狂瀾得到檻邊無盡日清風滿舳艫順逆去畱都莫計
人間波浪過江湖

虛能游世事如何齊物莊生古未多絕似君心全不繫
兩旁休爲種藤蘿

舟居非水古誰同曲折疎籬一徑通不乏倪迂高士筆

連人都入畫圖中

題胡起巖行樂

丘中堪坐且徘徊芳歲如花正豔開
師樹赤松他日事一編知自圮橋來

寄汪碧巢

千里霜蹄展也宜席門車轍記當時
荆花乍落庭前葉棠樹欣添嶺外枝
百歲遺黎傳世澤八蠻兒女誦新詩
桂江東下番禺近暫報琅玕慰所思

贈汪繡辰

昔年曾上敬亭山白岳分明咫尺間
今日見君談勝蹟

白頭猶擬共躋攀

伊人洄溯咏蒹葭小謝詩篇世所誇知子往來非別事
羅浮勾漏足丹砂

次答張宗肅端溪有約不值之作

溯洄秋水同高峽來去輕帆隔一時風裏幾行魚拜浪
沙邊終日鷺垂絲將期泊處吟圓月悔不中途命楫師
鷁首相迎成錯過和歌今者更遲遲

送顧天石兄弟歸無錫次其元韻

細風寒雨尚支筇送爾歸舟在客蹤天際一行飛北雁
斗間雙舉氣如龍依依欲贈亭前柳落落誰歌澗底松

所惜挂帆期太促不能杯酒更從容

贈馮開求

國士聲華滿國中每於時刻見宗工文章氣接東西漢
兄弟名高大小馮豈獨英才多化雨更聞古道善維風
丈夫正有無窮事莫遣霜毛笑老翁

走筆送潘子登

五峯登眺二年同送爾東歸又北風莫訝臨岐無一語
此心皆在已言中

藕泉爲孔少府賦

蓮花峯下學宮成官外新泉以藕名有本知爲君子澤

一泓先得聖人清涼生肝鬲同冰飲靜寫鬚眉似鏡明
洙泗淵源煙已久賴公重此濯吾纓

曲肱處自得居爲王雲庵賦

一肱伸縮總吾身偶枕閒齋夢亦真世上浮雲皆外物
箇中誰是獨醒人

自得居

身心頃刻不相離未得爲誰得是誰飲水入喉分冷暖
從來只有自家知

獨漉堂集卷十三

羅浮陳恭尹字元孝

游尹瀾柱銓部園林

屢有名園約初尋洞口來長橋行曠莽積水接樓臺入
座諸峯見憑高遠郭開怪君辭鳳闕家自有蓬萊

向暖蕉全坼新晴柳自低聞棋知閣近尋路到花迷玉
馬搖風數朱櫺射日齊樓頭人出迓一似隔虹蜺

布勢因林木周池見竹苞瑣牕文各變重閣路相交兼
靜團花氣波明落鳥巢飛塵全不到誰信近東郊

綺麗無餘巧幽奇復可誇蒼茫洲渚外籬落野人家歸

崔明深竹行魚聚淺沙水西雲幾片飛作日邊霞

翼沼闌干曲依沙石幾叢新河分水碧初葉擬花紅最
愛古榕下蕭條寒食風曉來加做緼吟盡畫橋中

曲渚平無浪扁舟晚不歸如何巫綬客亦有釣魚磯天
月欲隨我水雲微上衣小童輕把棹莫使白鷗飛

蕭瑟北林聲雲如萬馬行坐中高閣雨天外幾峯晴向
浦帆光溼依人燕羽輕羅浮開一面悽切未歸情

半月爲孤客流連爲好朋不眠將盡夜頻剔欲殘燈酒
助長談力詩矜一字能雲霞多變態高閣更晨興

近宅偏饒水跨江復有湖磬聲僧院小山影草亭孤萬

卷名書簾千株號橘奴尋常侍家宴一月幾登臚
白日開名飲青鐙尙此堂節譟檀板細凝手玉簫長立
史傳觴政飛花佐酒香山公性多可都任嗣宗狂

送監公漪歸閩中

冬春積陰雨十旬三見日城闕爲泥塗淒風閉寒室居
人屢興歎況子猶孤客卧起逆旅中圖書滿筐篋撫劍
一高歌長江浩蕭瑟僕本蓬蒿士歲月時一出愛君美
詞翰過讀常促膝如何倦飛羽更問閩山轍東道阻且
淡相思隔浮岳有親在白頭留子終無術何以送將歸
獨有江南橘

送孔樵嵐入都

九州日炎暑驅馬有所之豈惜道里遙念君來幾時昔
來春已徂今去秋方初人生不如鳥燕燕猶未飛鳴蜩
息高林泥濘在中達帝廷玉帛會于役有恒期況聞道
維揚可以觀慈闈君親誼至重安得顧其私匪無良朋
戀行矣勿遲遲

西北方阻饑東南荷戈戟斯民獨何辜上天無乃虐噉
噉鴻在野往往人相食猶聞凍餒餘未免多求索豈無
有心人付之長太息子抱經世具慷慨足智畧雖云在
下位自待良不薄修途八千里耳目親所歷何以獻彤

庭蒼生望膏澤

惠州西湖歌贈葉金吾猶龍

杭州不過方十里潁上無山空勺水老夫未免有鄉情
敢道他皆不如此惠州城西幾百峯峯峯水上開芙蓉
我欲窮源安可極野烟空翠飛重重鱣湖之水明如練
弱藻潛鱗皆可見豐湖之水曲若環扁舟一去何時還
菱花荷葉紛紛長巨筏中流垂網水晶魚小價偏高
犀帶橋長人共往金吾亭上好看湖遠近纖濃勝畫圖
微風作浪打山脚白日倒景懸城隅金吾勲伐藏盟府
天許閒身作湖主買斷龜峯千頃波增築樓臺三百堵

飛甍往往雜茆茨隨山高下總相宜疎闌架竹通閒地
畫舫傳觴入水籬吳歌楚舞看未足更奏銀箏度新曲
千金製得鳳鸞衣萬里載來燕趙玉如君好事世所希
一日百萬真可揮當筵意氣映四座使我不醉何能歸
別待他時百花發爲君更咏黃金徽

猶龍得鄺中秘古
琴同人多爲作歌

同梁藥亭屈翁山凌天杓林叔吾泛舟東湖承高

西厓邑侯垂訪談讌逮夜赴湖主人尹瀾柱銓

部之招卽事賦贈

我愛清秋好因爲湖上行拂衣昨夜度江水青山畫舫
遙相迎垂楊飛絲映朱閣古松擢幹排蒼冥湖上多故

送梁藥亭北上

南梅枝暖北梅寒君去穠花次第看風雪一帆辭海國
天人三策上春官世情莫惜嘗雞肋詩句多吟在馬鞍
得意定知歸計早此心先許釣魚竿

寄喻賡三

春來頻客素馨田想見高吟百卉前瓊海罷官唯白髮
蜀門歸路在青天埋名後代還誰賞廉吏今時不謂賢
同是舊人君更老相思遙寄夢熊篇

贈陳將軍

廿年相見在行都三十魁梧好丈夫匹馬射潮江上過

雙龍盤劍殿頭趨詩中琢句占師律局裏敲棋識陣圖
今日建牙滄海晚秋霜飛上美髯鬚

懷梁藥亭

昨聞歸棹越黃河又向維揚渡口過三月烟花雖寂寞
六朝秋草更如何高堂待進斑衣舞下里猶思白雪歌
一第蹉跎那足歎貴人傳者古無多

送石鑑禪師住匡廬

英英丰骨透巖稜五老峯前作老僧已悟心中無一法
却歸林下演三乘風搖凍壑聞冰解水漲平湖見月升
迴憶十年論劍夜雲泥今日隔千層

送區四之廣海幕府

濃睂方面玉肌紅骨相人言似阿翁臥讀陰符殘月下
自磨雄劍亂流中魚開夜日常疑火豚拜波心更起風
幕府晝長無事日好詩吟賞與誰同

贈趙意子

拋却儒冠學用兵田園荒盡不思耕終年避地青韃破
一夜憂時白髮生松栢本來多直性英雄何必定成名
憐君困甚還兼病父執相逢淚滿纓

送家中洲歸草堂

移家歸及九江春舊館初開事事新圖史暫拋中酒日

枯槁閒作灌畦人花兼細雨泥濛巷柳帶高鶯出近鄰
卽戀芳菲難得捨詩篇先許報交親

喜王東村歸

疎星三五未成行魚子花開客到鄉小婦罷啼牛女夜
大家爭解驅驢囊階苔攤席閒眠破鄰果攀枝徧索嘗
走覓城西苦吟伴舊鬚添出幾莖霜

送譚天水入燕

天涯到日歲方新草嫩郊原漸少塵官路聽雞行落月
帝城騎馬作閒人冰簷屋雷玲瓏曉雪照官桃婀娜春
雖有故交爲侍從馬卿能賦不妨貧

同寧都魏和公崑山徐原一同里王震生高望公
湛用階程周量何不偕梁器圃陶苦子集藥亭
六瑩堂得真字

竹窓藤几迴無塵一會西園盡俊人濟上魏舒爲舊好
鄴中徐幹是嘉賓霜催細菊浮香早風落高梧透月新
隨興攤書還席地野情疎放本來真

寄陸雄州孝山

曲江祠下俯無涯鎖鑰關門倚妙才薄俸散歸名下士
新詩多似嶺頭梅北樓天淨峯爭出南浦橋高舶競開
昨日人來頻見說郡齋寒葉落成堆

寄古鍊師

五千言外悟精真切切過來不壞身
澆酒乍禳東國火
擲泥閒化下方人開將笑口流春電
養得家雞在日輪
歸去閩風上頭住玉芝宮闕總如銀

同梁器圃宿羅澹峯石湖

一湖烟景在登樓足耐閒人十日留
隔岸山光橫枕上
遠天帆影落牆頭
溪多暗響常驚雨
竹有寒聲不待秋
況是溪翁共疎放
玉尊開酒夜傳籌

泛舟甘溪送薛爰州朱次公李祈年歸龍江

春江何處不萋萋
掩映羣峯到郭西
岸柳飛花時度水

山家開戶半臨溪已知異境人間少難得同心酒坐齊
莫指鄉園便歸去舟前聽取鷓鴣啼

送陳人白王問溪歸瓊州

送君歸去不勝情共國猶懸兩月程黎母山前開晚照
蘇公樓外正秋清檳榔過雨垂空地玳瑁乘潮上古城
到日從容問耆舊爲予再拜海先生

夜起西山草堂口占別吳又札梁顒若梁亮圃

無成三十老漁蓑舊國淊慚此屢過生計未知何事好
詩篇唯覺別人多高城曉角收涼月岐路西風長白波
猶幸交親不相棄夜燒銀燭爲悲歌

壽張太翁

增城侯文烈公之父

星星白髮曉常梳八十長聞健起居種就碧桃看結實
教成雛鳳每冲虛衰年手佩通侯印壯子名傳太史書
須信靈芝根有處羅浮山色在門間

寄湯惕菴先生

早辭旄節遂抽簪渺渺高蹤不可尋江上二毛生子舍
天中孤月照臣心青松自必千年老白石聊爲半夜吟
近別海頭無一字壺公巖迴壁潭深

答家中洲西還見寄兼懷梁藥亭

西還北去各經春暫別俱爲久客身江上寂寥同賦地

水邊朝暮閉門人蛙求怒敵行階草鳥引饑雛蹈甌塵
報與窮途狂大阮陳平家巷古來貧

壽易吾豫

帝里看春最少年比年多只戀林泉頻移隱地金囊澀
久坐窮山木榻穿脫粟便爲終歲計道書相共午時眠
酒酣笑向妻兒說梅尉元來是列仙

湛用階折並蒂蘭一枝見貽子旣拓落於時兼有
悼亾之戚空齋嘿對觸興爲詩

九畹多勞植異根一枝真稱野人軒似傷萎去將隨草
却笑生來卽碍門莖紫或曾克楚佩心同端不負蘭言

抵愁晤對香光下雙影偏銷獨夜魂

梁藥亭偕蒲衣赴車陂荔枝之約余病新愈憚暑
不果往却還新塘舟中寄懷兼柬車陂諸子

郭東收雨水新澄咫尺溪橋不共登林岫未忘多病客
鷺鷥閒似少年僧樓開靜沼難爲畫荔枝紅衣不讓冰
想到山堂今夜短幾人吟共一窓燈

雨中放舟同諸子登青雲閣

蓑衣箬笠好生涯不厭頻頻上小艇秋浦暗雲連埤垠
遠天殘雨在蒹葭青山對酒添新色彩筆登樓盡作家
誰約一竿相伴老鄙人親起醉江花

寄懷何克諫何景雪

君家隱處海雲東，水繞青螺一百峯。
初日芙蓉三謝句，西山薇蕨二賢蹤。
投竿擬傍羊裘老，負土新成馬鬣封。
猶感故人嘉惠在，相思和夢夜千重。

代寄毛子霞

久辭黃綬逐征蓬，欲訊離居意萬重。
倚馬近飛何處檄，烹魚頻是隔年封。
江湘屈指三千里，衰老低頭四百峯。
一讀新詩一惆悵，鶴樓尊酒限相從。

答梁駟若

伏波橋側石湖灣，生長難忘是此間。
窮海見聞唯白浪，

孤城表裏出青山身同墜葉猶知本老對衰楊自怯攀
頻得瑤緘遠相待好秋端爲故人還

詹侯竹也招集竹窺園卽事

怪石堆園作一坡新晴終日倚欄歌滿壺玉酒閒人醉
出匣銀鉤古字多傍蒞山峯吟並立照階林葉影相摩
尋常車馬稀容接得許花前數數過

答劉漢臣見寄

春宵猶憶奉金鍾伏暑書郵久未通乍有清風來戶外
不知新咏出函中才高豈但驚人座年少須邀蓋代功
若問老夫同海鳥姓名將換信天翁

送陳季長歸福州

丹楓夾路引青翰霜後澄江亦自瀾十載獨行珠海渺
一家歸計雪峰寒將雛彩鳳飛何急避弋冥鴻見漸難
從此溪山發奇思新篇須滿故人看

送朱鑒思歸揚州

南海風潮極大觀廣陵濤氣正須看暫辭虎帳論兵地
歸里羊裘舊釣竿殷浩清言牙慧利孔璋飛檄箭鋒寒
何時重覩東京筆白豕文章列史官

戴怡濤使君再攝廣州旋得實授拜命之日卽值
生朝祝之

梅花飛蕊灑城隅五馬新行卽舊符
潁水重臨黃相國漢廷真假寇
雍奴一陽建子今初復維岳生
申古不殊人士早磨詩石待郡
齋清咏似韋蘇

寄祝馮再來中丞

是日值立春

維岳生來不計春今年生日正春
新盡收肅殺還天地重布陽和與
世人燈市穠花連綠樹青郊仙仗
迓農神海隅父老相逢說春在中
丞兩畫輪

官爲白簡生風地德應青陽解凍
天欲使瘡痍歸衽席頓將鸞鳳易
鷹鷂精誠星日高難格忠信波濤
涉亦全金馬棠陰無恙否石羊城
下已三年

山林廊廟本相須，往哲流風今未蕪。
下榻不妨留孺子，倒衣頻見禮潛夫。
言無可擇何傷聖，山縱難移亦分愚。
昨夜西疇新雨足，一竿安穩釣溪鱸。

東湖曲 十首

柳絲風裏木蘭船，夢想東湖已隔年。
湖北湖南多月色，南湖沽酒北湖眠。
向曉扁舟自解攜，風吹東去更還西。
荔子直從窓口落，荷花恰與舵樓齊。

湖西堰口接通川，畫舫爭潮入占前。
金環玉腕親持漿，錦袖紅靴自打牽。

僧寺紅亭映水涯
袈裟來去各乘槎
午食不離荷葉飯
夜燈長結素馨花

大石樓連小石樓
上樓遙見珊瑚洲
洲邊花艷誰家女
笑擲紅菱打白鷗

金作飛龍照水寒
千人齊唱萬人歡
朝來試切銀絲膾
怪道池魚膽盡乾

雲歛空江月滿汀
方舟行處衆聲停
新歌一曲清無敵
小妓生來十五齡

潮生雲起兩相催
咫尺江山雨不開
雲自羅浮峯頂出
潮從大小虎頭來

一簇笙歌隔渚繁
綵雲飛盡日黃昏
欲知游女低徊地
朝踏蒼苔見履痕

垂楊橋晚歸人少
近水亭高遠岫孤
正是郭西難畫處
淡烟疎樹似倪迂

贈許伯玉守戎

孤峯特立海東涯
秀出如君衆所誇
武畧卽今推獨妙
文章先世是名家
三軍共仰黃金諾
千里兼多白玉驂
此日廟堂方拊髀
會從天上賜高牙

贈賈中軍

荆郢爲都自昔雄
將軍威畧有儒風
長江獨扼三川險

半壁曾高百戰功，近建旌旂滄海上。會題名姓漢臺中，從來好士心無極。嘉譙猶招白髮翁。

乙亥除夕同袁密山史蕉隱藍公漪集王紫詮使君寓齋次東坡元旦立春韻三首時余以夜禁先歸

東風恰與歲朝回，徹夜江城爆竹催。莫笑當歌却歸去，青春非爲老人來。

東西南北偶然同，細酌春醪報歲功。鄉夢自分千里外，客心先醉一杯中。

燭燧綺席未知寒，夜禁嚴城苦不寬。只隔禺山盈尺地，

自邀春色向南端

徐星漢燕爾未幾卽有惠州之行戲次王使君三

十韻贈之以速其歸

天作他鄉合睂猶故里齊劍光龍乍躍桐影鳳雙棲冠
玉仍逢負探珠獨得驪才同司馬濁齋異太常泥方朔
能遺肉淳于每滑稽筆端來滾滾吉事欲折折媒氏初
通好故交還贈綈雕鞍五馬借筐帛百人齎贄古先鴻
鴈金堅及鼎鑄燭間杯號色海外鏡名璫京兆新眉曲
檀郎款語低俱飛宜繡蝶教妒勿烹鸚鵡睨親曾命羹
湯手自翫雪腮深夜伴雲鬢未明笄字共璇璣織絃從

玉軫提邀閒

月榭連步下花蹊伐性誠知斧鑿心不

任銳十年甘旅處此日識坤倪宿約聊須踐新家未易

攜琴聲非別崔詩草是奔猊

徐浩草書如怒猊

去定經羅岳歸

應贈佩觿買舟風自北登路首頻西閨裏年爲日人前

笑是啼禦冬餘旨蓄先事戒鹽醯雲母溪堪念

何仙姑煉藥地

梅花夢莫迷林蜂依密蘂山獸護香臍擲果思櫻口浮

灰憶瓠犀早期回綵鷁相待傲鳴鷄穠李樹方及初婚

賦未題使君憐歲晏不遣久孤睽

歲除雜感十首

歲聿云暮人皆有懷莫引其端無因自發惠州

王使君子千示以十律遂次而和之譬之秋蟬
宵蚓各自爲聲而比竹絃匏無妨並奏云爾

散髮晞朝日添衣過暮年自從梅蘂笑衰受朔風憐眼
暗吟何害眉酸字弗便羅浮春信早書寄惠州船

薄酒眠無力寒衾夢不真庭闈猶顧復箕尾已星辰學
媿爲裘舊名知汗簡新九原從豈遠寢廟未歌輪

雨澤今秋少蕭條井里間海田增斥鹵溪水失潺湲一
日蜡誰樂終年農共閒貧家繁食指僮僕漸思刪

醉鄉徒作記酒郡幾時封入世無長策登山有短筇湖
光豐鱷合雲影石樓重相約攜杯竿南天幸息烽

種藥池邊地良朋樂此留無方名却老有草號忘憂月
好還同咏時難不妄游爰州稀勝跡獨上尉佗樓
未歸仍是寄喪我孰爲吾避世無金馬潛身鈔玉壺燈
猶寒夜剔心爲昔人枯敢望鴟夷子功成尙五湖
鬚眉今若此清鏡背人看愧共侏儒飽難同范叔寒夢
中天莫問鐘後夜方闌地氣應南轉年來雨雪漫
從無西笑樂不勒北山銘艱苦應吾道浮沉惜此生二
萬已過日千秋何限情書齋空自歎誰是晚能成
舉世多知我何如我自知近歌年冉冉昔咏黍離離儒
術夫何敢禪燈亦偶窺若云高與潔千載欲誰欺

閱世浮雲變觀心萬累空雄雌歐冶劍得失楚人弓先
甲年重值元英月又窮算來終歲事詩律也輪公

上元後二夕長壽精舍雅集同王惠州陳韶州兩
使君梁藥亭廖南緯屈翁山王礎塵沈上錢方

葆宇 陳生洲黃葵村分得來字

使君五馬並能來陸賈城邊白社開人影隔橋頻送酒
雀聲迎客共登臺東方皎月宵仍滿西郭煙花日漸栽
幸值行春駐旌旆挽回端藉濟川才

江頭前夜報輕雷花底新陰綺席開稷下放設多學士
梁園能賦盛鄒枚風傳野鼓催燈出潮帶春星入沼來

詩句未成軒騎動重城深隔媿追陪

大司馬吳留邨壽日有靈州之行次日還值冬至
補祝之

冠蓋朝仍集江干昨有行賦猶初度作日是一陽生南
陸迴義馭東山見物情野人歌赤舄併入袞衣聲

靈洲千載寺郭璞讖猶存壁峭通禺峽江清見石門溪
山新命駕風土舊承恩盛氣當年事從今更可論

謝傳登臨處圍棋得數陪玉杯吟復舉銀燭曉猶催廓
落千秋志雍容七步才英雄兼著作從古幾人來

二年歸節鉞五嶺藉恩威士憶投醪醉身從解組肥馬

蹄猶角逐容鬚漸霜飛未可駢行樂乾坤尙鐵衣

送吳鴈山歸杭州

無事行千里閩中與粵中文如韓愈怪途是步兵窮遠
志傷騏驥歸心背鴈鴻因君念湖上霜葉滿西風

重別方蒙章

已分離居久今知未果行重爲江上別得盡故人情吏
道時來雜民風日以爭不貪洵可寶之子有平生

方長斯侍母夫人之其兄蒙章官舍賦別

綵服去翩翩初游屬少年皇華雖客路荆樹卽堂前越
雪臨書曉吳山人詠偏遙知文采美不讓阿兄賢

冬日寓梁藥亭六瑩堂始刻日作古樂府梁王顧
白車陂至是夜歐陽偉人劉漢水過宿分賦得
燈字

過雨聞簷滴南天未有冰月開梅下地風定草堂燈淺
酌猶煩主深宵況得朋預知吟興罷書貴剡溪藤

苦吟分得絲字

力窮天地外獨立夕陽時物態皆吾巧春風不自知舌
從荆婦笑香遣穉兒司究竟成何事年年催鬢絲

彈琴

幽人何所有虛室有清絃素手偶爲撫秋心一渺然月

搖寒島樹風落夜山泉直自迴元氣鴻濛太古前

荅家獻孟

諸中傳舊好酒後見新詩一日吾爲長千秋汝在斯金
無留礦埋玉有照人枝每抱才難恨而今喜可知

送龐野直之陽春

春州三百里非遠亦堪悲世難依人地家貧爲養時路
邊雲是石馬上檄兼詩知有神明宰無勞理繭絲

次韻畚壘升璐

勿用潛龍德無雙國士名江城逢永夕風雨戀同聲竹
實非時賞琪花豈世榮夜聞論戰伐一倍切歸耕

北望猶龍戰西飛空鴈音英雄時不作廣武歎何深念
子辭蓮府將歸舊竹林子春有高節不獨愛豪吟
孤雲雖異託高燭數同堂深淺看浮白升沉付彼蒼別
來頻有寄欲報不成章倘枉山中駕秋英未乏糧

題王茂名令詒南行圖

大才何處不閒身百里新花況值春五斗已餘供鶴米
一官仍作著書人

又柳磯圖

萬縷籠煙訝許同一竿搖漾柳橋風王郎濯濯如春月
更在龍鱗鳳翼中

送李尚卿司諭長寧

祿雖升斗尚爲儒吏隱今時只此途
送子更添無限興佳辰頻得到西湖

又送王立安

別子三江日木綿今又開一年燕與粵萬里去還來識
老增新感詩工勝昔裁嚴君方北發先待鬱孤臺
金陵雖暫住不比在他鄉北望京華近西流蜀水長
佳兒娛旦暮諸弟共文章港下多商舶來書寄數行

九日湛靜齋亦宋喬梓載酒元明石室登高同郭
公驚湛天沐天及禎士文安澤君介以長兒端

木縱飲至夜月高而還地爲甘泉先生書院故

址碑碣存焉

登臨不覺杖頭勞屋外晴峯石勢高南盡海門飛白鴈
東來帆影走洪濤千杯酬酢寧辭暮一笑乾坤且自豪
在昔重陽誰對月應留住事待吾曹

媿無新句謝煙霞二十年前此寄家老樹有根蟠石底
古碑和字長藤花清秋高會人猶昔白髮重來歲漸加
先正追蹤英少事釣臺風月滿江涯

九月晦日同王惠州王礎塵連雙河諸公集石公

精舍送秋同限蕉字松字

黃花開盡轉無聊處處園林戰綠蕉頓覺朔風凝玉露
不知明月變涼宵郊西滿目登新稼物外何人識後凋
想到北庭冰可折最分寒燠是今朝

鴻來燕去各從容白帝將歸駕白龍且讓羲和旋北陸
尙餘朝爽在西峯千巵醪醪忘憂酒百尺青青偃蓋松
暮別山門尙回首數聲猶是此秋鐘

次答張鄂山

信道三人必有師白頭寧恨識君遲杯浮菊蕊香猶在
詩寄梅花語亦奇湘曲幾時歸賀監海邊何處覓安期
深設不覺銷紅燭旅宿高城斗柄移

葛相當年出渭濱
雜畊心事更誰陳
身肩半壁成還敗
名在千秋久愈新
高塚麒麟添宿草
遺黎蘋藻薦青春
煩君爲酌湖中水
慟哭西臺尙有人

家敷公自桂林分闈還惠我湘竹杖賦謝

舟楫歸從桂水湍
多君持贈玉琅玕
逢人眞信成龍易
有實方知集鳳難
數點迷離堯女淚
一溪煙雨子牙竿
年來老脚差能健
從此登高得羽翰

送潘涵觀之高涼二首

黃花新後紫梅新
送子扁舟正小春
三萬六千過已半
東西南北倦游人

君家曾入列仙書，心影無偏古所譽。好到潘山奕棋處，
乾坤一局問何如。

畚潘子登

天之爲文星與月人之爲文筆與舌，自從星月一晦冥，
文章正脈幾干絕。挑燈昨夜讀君書，字字行間皆有血。
君父之辱義正同，有口莫向他人說。精衛填海海未乾，
愚公移山山可裂。山崩海竭必有時，此心不與天壤滅。
蘸筆須到星宿源，磨鋒必用昆吾鐵。但能閉戶造堅車，
今古修途同一轍。

送鍾橫塘

橫塘爲子繪倚杖圖甚肖比其還也子有殤女之感口占送之

昨來倚杖立秋風白髮丹顏一老翁今日送君難復繪
衰顏新減幾分紅

五日汎舟珠江餞王紫詮使君觀察川南

清尊相餞木蘭橈萬里西行使節遙珠海共吟唯此日
蜀門一路在青霄江連金鼓濤聲壯山雜雲霞雨氣消
向後題詩人漸遠風光雖好亦無聊

同潘子登盧僑斯余兼五小飲梁巨川山館分得

十一真

樹影橫階不染塵。牆頭山色況嶙峋。半年好月唯今夕。
四座清風盡雅人。杯有淺深從所好。語無倫次任吾真。
短衣出送溪橋夜。明日相尋在釣綸。

同潘子登梁巨川廬。僑斯集向恬菴咏夾竹桃花。
醉裏看花倍覺妍。臨風一樹獨嫣然。瑤池嶰谷來何處。
翠袖紅粧色可憐。灼灼最宜之子室。猗猗如咏衛侯篇。
秦人洞口原非遠。莫誤漁竿上釣船。

月夜紫詮使君寓齋同藍公漪朱甸安吳山帶疊
韻三首

咫尺濂溪有舊祠。石存九曜已無池。光風霽月今猶昔。

辜負前賢石上詩

月午應門未上關
塵機暫息似空山
澄清天宇誰能滓
多謝微雲點綴斑

漏水迢迢轉玉龍
金壺銀箭未從容
眼前共坐人千里
良夜他時何處逢

羊城月夜同王紫詮吳山帶次藍公漪韻

衆竅因成籟一絃
猶撫琴豈能諧里耳
聊以散幽襟地
古春懷遠杯涼夜語深
三農方望雨明月最宜陰

答山陰劉道晷

舊識稽山禹穴東
君家門地有清風
近緣伯父

令伯知語石

猶子曾聽而師

董允

說若翁龔勝臥牀仍矢節謝翔許

劍亦全忠成仁取義無今古劣筆空慙史傳工

有進川南使君新荔枝者是日初嘗苦瓜使君紀之以詩與吳山帶和之次吳韻

二年留滯思三峽七載清吟守一麾瓜果東南嘗已遍無人輕快似消梨

疥皮青紫各爲籃君自能食我亦堪只是平生酸不得越人嘗膽舊來諳

次翁兄病中見柬

文章頻寄慨造物久勞形已錮函中史難言石上銘寄

歸同大夢修短自高冥來下王喬玉何當燕翠屏

王川南使君紫詮招同李宮詹山公袁通政密山
梁太史藥亭藍山人采飲游靈洲予以事不果
往諸公分韻及之仍同游韻八首

目送輕帆出越城靈洲西去趁潮平山環野寺天中斷
水繞高臺月四明荷葉采爲酣飲具梵鐘和入苦吟聲
髯蘇詩石蒼苔上不獲同君躡屨行

本是閒身偶不閒搢頤吟望海頭山離懷黯黯傷今夕
時友人屈翁山物故漁火星星別一灣聲氣相求南北合行藏難
定去來閒當年頗記尋僧夜隔水呼船月半環

石間隨處宿僧房長夏無風也自涼得句好題青竹粉
有人曾悟木樨香畫橈倚岸傳歌板冰簟橫階置筆牀
望日始過良夜短詰朝明月有餘光

使節東西路各遙

宮詹川南將去

良朋遠近返巖椒

密山采飲將歸

一

堂嘯咏同斯地萬古溪山有此宵赤水得珠期象罔滄
溟爲鳥待扶搖無才久已安衰拙不與揚雲歎寂寥

漢將旌旂下石門天南霸業已全吞宏農盛氣占孤嶼
刺史清泉翳樹根北去京華猶古路南來尋陋失荒村
眼前陳迹千年事一棹沿洄好細論

荔子壘壘帶夕煙維舟深竹似涼天鄉人尙識紅雲宴

居士同叅玉版禪
鶴聽琴聲依檻外
月搖江影上燈前
夢游却比狂吟勝
欲學希夷且打眠

石勢差巖別一峯
隔江雲影岫重重
人來彼岸先尋筏
壁護籠紗不爲鐘
閒以深杯邀顧兔
笑吹橫笛起吟龍
寶陀自是千年院
偃蓋當門見老松

探奇今昔幾人來
小院初爲上客開
佛有慧燈曾不夜
天飛明鏡復當臺
旌旄繚繞移煙樹
筇屐從容踏翠苔
拈韻禪牀吟未了
袈裟長揖使星回

又疊閒字韻四首送李宮詹山公歸都門

崔禁龍樓職最閒
爲誰驅馬涉溪山
五雲新命來雙闕

黃木千秋尙此灣
日照蜃臺煙靄合
風隨旄節有無閒
洛書河數皆時瑞
不獨西王獻白環

史館清華未是閒
袞衣何幸在東山
雕鞍晚覓菩提寺
綵鷁朝移荔子灣
得御名流盈座上
著書關令候行間
皇華使命殊三晉
不向諸侯問玉環

霄漢翱翔歸去閒
回頭休忘嶺南山
青林近夏初飛葉
碧海彌天不見灣
鷁視眼明藏匣內
鸚禽言好入籠閒
殊方草木添新狀
萬里經途一轍環

本爲桑者樂閒閒
不用棲心別買山
中夜每尋觀日處
幾年曾釣落星灣
老耽濁酒風花下
細讀清篇水石間

高價便堪城十五報君難得玉雙環

佟聲遠索題連珠塚二首

纍纍雙塚倚山隅薤露風前尙綴珠不有詩人能作誄
彭殤千載亦何殊

一丘埋玉未須哀明月偏宜老蚌胎滴淚暫歸泉客去
報恩還入掌中來

東家比之

當年文社狎齊盟蔚蔚天南各擅名

崇禎先伯園公先生先君巖野府君

並有蔚園稿行世

繼世才華吾與汝一門風雅弟難兄鹽車豈

久驂騮步阿閣將看鳳鳥鳴韓樹花生知有日秋風先

報五羊城

王川南招陪樊檢討崑來劉銓部省菴集長壽石
公精舍分得二冬

故作禪房會深防俗子逢僧歸萬里浪客到一聲鐘北
酒邀新月南花發孟冬後期那可易使節爲從容

陪王川南飲何慎思邑侯署中登超然臺作時將
有西樵之游

山水游蹤此泊船風流賢宰夜開筵籬花對酒如含笑
霜月當頭正上弦一徑細穿修竹裏諸峯忽立古臺前
官衙勝處誰能到賓主燕吳不偶然

佟聲遠招同王紫詮使君樊崑來翰檢趙秋谷宮
贊梁藥亭吉士胡

雅集栗園看新梅分賦

五律得八庚

戶外青絲騎林中白玉英此時天未會一片歲寒情老
脚聞香住方塘倚酒行念君趨省侍非久寓三城

七律得九佳

積水清冷照小齋深冬雲物尙能佳峯峯黛色眉誰畫
陣陣鴻聲字不差南郭子綦風激謫東方曼倩語詠諧
酒闌更繞池邊樹笑指新梅似玉釵

聲遠新有
小星之賦

次答周雪客

鬚眉白盡似非吾感物依然獨向隅百歲春光駒過隙
一生行跡鴈銜蘆非魚莊叟寧知樂如鳳寒蟲祇自呼
君是梁園貴公子未應同慟阮公途

再次周耐菴韻送之

烏烏何必勝吾吾無事悠悠守一隅詩思尙存荒徑菊
道心曾折渡江蘆嗟來路上人多食時粵大饑歸去林中鳥
獨呼寥落風花又三月青山空自滿前途

元日次梁藥亭韻

野服坐坐拂野煙小臺閒上望高天三城霽色開新朔
十日東風尙舊年十二日立春雪在顛毛元共得詩如兵律

獨無前知君久謝金門步茗椀相尋月井邊

人日次梁藥亭韻兼柬川南長壽

衰顏與嬾歲俱增心在冰壺更著冰七日爲人雖復爾

五倫于我獨存朋

子于朋友一倫差可無憾餘皆有不可言者

川南使者新

貽酒海外歸僧昨寄藤舊好無多皆白首草堂期續夜

吟燈

二十年在藥亭城西草堂作詩嘗連月不寐

送黃蘭偶暫歸金陵卽同王川南入蜀次見贈元

韻

少長曾聞上已遊十年節序嘆如流東風又綠王孫草
別酒重開趙尉樓扇枕歸心當永夏挂帆行色近清秋

川南使者今詞伯入峽猿聲不用愁

袁爾 元戎向惠端硯久未謝也今秋偶過補詩
奉東兼懷密山黃門

前年頻得望清暉酒罷分攜寶硯歸
鵲眼尙明猶戀主龍韜曾伴有餘威
漸忘盾鼻同飛檄久困齋頭共掩扉
莫訝瓊瑤全未報黃門行後少珠璣

引睂姪河涘中了蘭盛花兒曹過而作詩引睂索
予爲之率爾成咏

靈根產自嶺雲深高館何因得共尋
莖有數岐唯一本花皆純潔驗同心
七絃每爲王香操九畹曾勞楚澤吟

若遇昔人應嘆絕玉枝連理在于今

了蘭花視諸
蘭最潔白

又壽馮使君次趙秋谷夜話韻

山中一夜雷十日流未歇況乎雨九州膏澤周窮髮上
天生英才乃爲斯民役功業貴及時歲序如過客使君
出相門賢聲存楚越寧期庾亮樓却對珠江月天鏡八
張絃堯蓂十開葉畊鋤托樂郊祝頌非昕夕願扇太和
風疲疆日繁息再紀神爵年仍升鳳皇闕

次韻答羅浮山因東其舅汪栗亭其叔羅廷錫

清論應爲第一流禪林相見晚山稠文章自許藏名岳
姓字偏宜紀石樓舊好情深勞遠夢新篇佳絕想前游

知君宅相淵源在南望同悲宋玉樓

浮山前度來粵故友翁山有贈詩故

及

花朝梁藥亭招集六瑩堂送姚東郊歸桐城同王

蒲衣姚非熊

高齋紅綻雨初消美酒良晨未寂寥歸客正尋芳草路
南天早是落花朝交情到處多投轄詩卷誰家得射鵰
含嚼菁華不成句杜陵持論薄蘭若

南風帆席到非遙桑落洲邊不上潮入饌鮮鱗飛白版
滴牕疎雨剪紅蕉江光西望涵三楚山色東浮見六朝
舊好君鄉三拜在併將新咏寄東樵

謂方裕子也裕子東郊先後爲羅浮

之游故
及之

答戴桐侯

亭亭谷中雲獨往仍獨歸何來九臯崔相悅還相依清
風振清響白雪爲毛衣歲時或一至徘徊咏荆扉我生
澹無營散誕不言非君具霄漢翮覽德揚其輝緩者佩
以絃急者佩以韋各當行所是勿謂知音希

生生園十咏

幻雲樓

昔是誰人有今爲佛地初天光雲變幻樓影樹扶疎挈
鼓來川后燃燈借望舒白頭聊獨卧何必坐茅漁

雪香亭

高亭臨水次一樹報春歸
荀令如曾宿山人應白衣
同雲晴不散獨鶴暮相依
莫作南華夢聞香蝶易飛

悠然閣

盡道桑田改寧諳夜壑移
雲收天寂寂門掩日遲遲
有色花當閣無聲水滿池
從來真妄理只是酒杯知

潮汐池

漸覺池波轉曾將海脈通
淺深塵世外消長片時中
剩地叢斤竹閒花落刺桐
潮來還自去不問主人翁

鳶飛魚躍亭

飛躍平生意，鳶魚適此亭。世癡無日了，天醉有時醒。是月江皆白，何春草不青。只須人自會，休更問誰惺。

珠暉橋

驚雷收宿雨，初日現文虹。遂有青蓮界，遙開積水中。磬傳三徑竹，香度小橋風。滄海非云渺，微波自可通。

琴臺

風過松有響，石激水如灘。靜入幽人耳，遙聞清夜彈。引中思走馬，意內想倚蘭。莫上琴臺坐，南音不慣寒。

問鷗亭

髮短爭如鶴，人間莫羨鷗。未能迴冷眼，何以客炎州。空

谷聊舒嘯高天可寄愁旅中兼課子不用別詒謀

留香榭

駒光忙裏去鴻跡雪中留盡取開花笑誰期種果收百
行同一夢四氣自成秋君看長江水清清亦聚漚

生生堂

好生名大德豈獨在人爲楚虎曾分乳冰禽亦護兒但
期天下活安問腹中饑看子平生意何憂鬢不絲

荔枝次吳晉濤

年年慣見側生紅自讀新篇迥不同綺樹有霜朝更艷
冰盤無暑日初融空將異味疑曹氏未許移根入漢宮

君爲荔枝來嶺外一官吟遍二松風

次韻答徐紫凝

白首甘爲隴畝民生來摧折不曾春
易逢湘竹千年淚
難得桐江百尺綸
道在沉冥寧作我
書傳中論又何人
清詩未厭千迴讀
更遣兒曹寫綠筠

把牋終日咏瑤華
短髮燈前影自髟
縞帶未妨還獻紵
瓊琚無以報投瓜
飛來何處中宵笛
剪落遙天五色霞
恰似秋風亦知得
滿池開盡碧蓮花

曾攜孤笠逐篙師
數月輕帆浙水湄
湖上主人梅與雀
蘆中窮士我爲誰
驚鴻幸且違鰲
嫩雛鳳于今見羽儀

四十餘年如昨夢計君猶在未生時

文章大道以爲公今昔何能強使同只寫性情流紙上
莫將唐宋滯胸中維揚不入刪詩地百越咸歸霸國風
終古常新唯日月金烏先自海東紅

喜廖南暉自都門挈家歸里

粵臺風景尙依稀且向湖邊掩竹扉朔雪漸寒鴻合返
海波曾起霍先飛老妻相伴爲游侶孫子成行着綵衣
四十年來兵燹地白頭如此幾人歸

猶及承平記土風先朝人物足稱雄可能地氣來從北
欲挽狂瀾盡向東負郭席門貧孺子襄陽耆舊老龐公

交情兩世還誰在長憶吾翁與若翁

獨漉堂詩集卷十四

羅浮陳恭尹字元孝

咏物集 補序

咏物古不乏作者皆借物言情或賦而肖或比而寄興會所托感物而不泥于物所謂寓言十一也是集先子編定而小序未作因述其意以竊補之 男籟識

冬草得言字

無論南與北一種白連門豈不怨遲暮曾承天地恩遠風疎勁葉春色聚寒根獨立觀元化悠悠何所言

寒燈得遙字

亦自尋常見分明在此宵抱將心耿耿來對雨蕭蕭虛
壁涵光淺澄溪落影遙只須環萬匝長咏破無聊

紙窓

虛牖任風行燈搖坐不成誰開一匹練似得數重城自
鑒呈身影孤吟聚正聲古人於視聽毋取太分明

筆

亂毫猶可束今古更紛紛手劍不到處霜鋒時賴君柔
能含道妙虛足納風雲枯盡文人血名成屬典墳

簾

珠簾明瑟瑟之子正晨興翡翠爲裝帶珊瑚自掛繩雜
花沾未落雙燕入猶能只覺高堂上青山又一層

寒樹得陰字

非無生氣在孤直未成林幸以不材老能忘時序心空
巢懸宿葉新月下疎陰爲報青陽道前溪雪已淡

宿鳥

日暮將何適歸飛尙有林側銜千里翼獨立五更心山
月橫枝淺寒池顧影淡幸無彈射患安夢得于今

藤

遇物時能曲垂天自不斜可憐無尺土亦復着高花柔

是長生道清宜處士家柴門開一角山月也從遮

夜漏

滴滴來心上錚錚出暗風年流今夜裏天定此聲中候
日隨陰盡占星到曉空誰言良冶手真有授時功

春山

諸峯無近遠若與野人期未改高寒色青青又一時後
來花在眼昨夜雪添池凝着泉邊屋從今插短籬

春帆

極浦浮無際輕帆掛自牢入天雲片立排日海門高險
絕行鮫室風長引鷺濤故人春有信書閣坐勞勞

春岸

野岸關心地高花下亦花弱枝低浪舉輕片落風斜有
力黃柑酒無營白鳥家客中纔見月一夕夢汀沙

春草

春色來何處南州得最先萌芽依宿燒鮮潔近幽泉力
弱猶穿土光遙不隔天自今歸馬後隨地醉須眠

春泉

石上冰初解田間綠已陰無窮資地力不息自天心暗
谷藏聲淺平池見底深但令常潤下何用更爲霖

春衣

東風曾不定乍暖復餘寒走馬初沾汗看花每出欄佳
人傳素手公子試輕紈白石高吟客而今衣尙單

春屐

自蠟一雙屐南金不是過世人皆大笑未雨更如何高
齒防欹側淩泥免轆軻病身須託爾三月好花多

春燈

疎燈傳客影一半落窓紗老眼吾看暈東風汝亦花夜
吟良足戀春酒不勞賒犬子驚時節裁書問到家

夜潮

自知消長理豈敢恨蹉跎子夜泉心正南天海運多帶

風鳴石岸隨月寫金波曉起看新稼爲霖不是過

紙屏

自上孤屏紙輕隨獨坐身止防風及我不使事遮人汗
損關情好高方是德鄰朝來煩好手畫出武陵春

湘管

湘竹生湘水當年事可傷結根逢帝子餘淚亦文章採
作千竿筆隨歸五岳裝書成無可寫天地異陶唐

端研

磨涅終無恙光芒內自存得從高峽水曾是五雲根受
性元山靜爲容比玉溫文章被天下一似不能言

臂閣

截竹爲清玩，瀟湘意尙存。
雅形看不厭，小足立無痕。
妙得文心助，輕承玉臂恩。
點汗知可免，持此報天門。

玉冠

白玉爲冠好，輕輕稱敝袍。
淚曾和氏下，形爲屈生高。
韞匱常憂玷，隨身勿用勞。
衰年尤愛爾，相映鬢邊毛。

石枕

信是幽人枕，文章亦復工。
老松形化石，大匠斲成風。
暑月應能試，吟時不放空。
怪來連夜夢，只在萬山中。

竹杖

黃金如竹色竹老杖彌輕柱入空山路鏘然聞玉聲高
高上無極下見雲霞生早被仙人笑爲龍臥不成

銅餅

銅餅依石井朝日轆轤聲渴酒仙人卧澆花穉子行新
涼蘇膈竅古碧注清盈一飲消愁疾裁詩應口成

竹牀

受體止七尺編牀宜數竿却瘦餘慙近醒夢小聲乾不
費加繩墨何妨被綺紈金鏤與象簟穿鑿太無端

藤簟

一片燕山雪千枝海上藤結爲幾萬字字字讀成冰縷

細常欺髮光寒不集蠅暑天南地上從此絕炎蒸

茶竈

白竈青鐺子潮州來者精潔宜居近坐小亦利隨行就
隙邀風勢添泉戰火聲尋常饑渴外多事養浮生

螺杯

汝曲世所棄因之成巨觴縱逢千日酒不忘九迴腸江
海歸何益朋儔與每長誰能賦鸚鵡名字恐相妨

熏籠

楚竹製自古南藤新絡絲職宜司卧內法有用疎時佳
氣當衣滿餘香入夢知美人看暖後不復畫蛾眉

葛幃

細葛含輕霧多年製薄帷影形人共見心事爾如知不
喜猜黃絹無憂變素絲唯聞越溪女薪膽有遺詩

藥裹

事至初爲備防身未是嚴將祈苦口利須用括囊占物
土分南北纖微及米鹽但令人不病蛛網爾何嫌

瘿瓢

已分瓢俱培寧期匠見收在人思錯節于物戒懸疣量
腹爲虛受投身免貴游同根有枝葉灰燼已千秋

石磬

制作成何代嘉名出泗濱難逢有心者空學折腰人聲
古宜歌頌形方或矩身茅齋聊借汝終擬入韶鈞

香奩

近日煎香片前修未有稱芬芳人所惜暴殄世須懲用
火先防裂燃灰復可興此身如白玉三日試應能

畫叉

不謂高難及終知力有窮任人吾自逸致遠汝爲工枝
指傳蒙吏循牆學孔公豈如燕七首只在地圖中

墨池

石墨汝相得翩翩文采多雖居白黑外將奈濁清何滿

至先知損羣中不受磨毋言一勺小從古有風波

筆山

似得臥游圖峯峯落座隅併將文格古恰與性靈孤
意內存真隱生來伴老儒高深長在目聚米復何須

花架

青春雖共得弱植本難工小結藤兼竹無妨雨復風
細香通靜後微月覆軒東未少匡扶力花開不任功

棋枰

終古紛爭地當年克讓風畫如分易象度亦合天工
疎密羣星似縱橫末俗同無窮機與巧不出數行中

芒鞋

以貌若不足於行安有餘卽云素履往猶似結繩初山
色綠相得蘚痕青未除從來淡薄意于汝更何如

麈尾

麈尾誰家物設時廢弗能將無欺白髮喜不受青蠅飾
玉身雖貴懷瓊歲莫徵山中樂仙隱非願有名稱

鎮紙

刀錐皆見末汝鈍類模稜及與飄風會方多鎮物稱卷
舒勞重寄著作得良朋自古安劉者都無文學能

琴囊

古道寄山水正聲終在茲龍唇倘弗御鳳鳥至何時鮮
潔蜀川錦纏綿園客絲將知用心處不欲負鍾期

蒲園

蒲簾圓如月茅齋寒似冰難將幽獨意舉似住山僧暗
淚續清曉朗吟枯夜燈閒來看坐處書破一層層

蒿花

王礎塵折蒿花插瓶作四十韻與翁山共和之
憂世莊生日于蔬亦有蒿入厨充野蔌登俎讓溪毛軟
滑人爭尙芳辛衆每饗尊絲堪並駕萋笋或同曹養胃
功殊大驅疫效可撿理畦猶畫井疏洫漸成濠隔歲勤

鋤鋤先時舉枯樗散根臨雪候聚族冒寒臬葱蒨超羣
卉肥磽擅土膏卷芽朝挺箭叢翠暮生濤市價初終別
村傭往返挑貴時爭尺寸賤日委溝壕晚節誠無味其
花也自豪千莖擊蕾密單瓣着心牢衆幅爲輪小中權
築壘高嫩茸溪結蕊青萼細含毫搖落能經久離披尙
桀驚只應從物化終不被風撓追往頤猶朶於今首重
搔坐觀形色巧真覺化工勞鶯谷翎誰剪蠶筐繭待縑
濃濃如匠染淺淡受霜鏤倚鳳簪雲鬢攀龍上御袍無
香辭蛺蝶有苦遠蟬螬竟畝黃相鏃經春子可囊作金
曾布佛似菊欲依陶不遇高人賞將同茶蓼瘳折歸親

几硯把玩對醇醪
萎絕知何許
怡情信所遭
千言勞共賦
一字更承褒
薇蕨還登雅
蕭蘭並入騷
曾開蔣生徑
况慟孝元號
題咏終無及
纖微乃自叨
詞鋒侔劍戟
文戰列旌旄
嗜險窮幽眇
抽薪極汰淘
寧甘名嚼蠟
不肯事餽糟
夏夏敲羣玉
鏘鏘奏八瓊
祗緣花不俗
遂覺懶難逃
周道傷離黍
中園感有桃
詩人工比物
聊以代心忉

霜橘

嘉果生炎甸
飛香始素秋
一官曾命秩
千樹擬封侯
綠葉霜彌翠
金衣晚未收
玲瓏明夕照
磊落亞枝頭
浥露

姿常潔搖風帶自柔厥包神禹錫作頌楚臣優偶入金
盤採蒙兼玉饌羞甘酸消宿酒清冷破牢愁小瓣輕鐳
袖微紅妒石榴光凝珠的的聲入齒颼颼水玉深潛壑
堅冰滿貯甌近之清內熱聞者亦涎流有目應同賞非
時莫暗投苞中仙對奕江上鶴成樓實以踰淮變花從
到鄴休貞操元自固衆卉豈其儔藥品皮爲上醫師舊
是求青黃分所治沉痾賴能瘳色味稱俱美驅除力更
尤有如詞翰士兼善甲兵謀筋核皆堪取蟲魚不是譬
一身無棄斥萬里極車舟橘譜原多種詩篇亦滿眸醉
來渾忘却何處更旁搜

小魚缸 惠州王子千使君席上咏

古之五審哥官定有明所寶唯嘉靖五審近者亦千年
舊物僅存希不病肅皇臨御久且寧元修內醮期清淨
中官監製下浮梁供奉雖多誰敢諍無論大器小亦精
雞缸魚缸最得名君之酒杯無乃是朱魚上下缸心明
缸之所受不容吸四魚與酒遞出入滿時或躍酒池中
乾時不作沽魚泣搖鬚鼓鬣若毫芒掉尾昂頭似人立
昔聞釀者有玉缸此缸清妙古無雙拊不留手柔無骨
虛明瑩徹當銀缸質輕如紙內外見酒淺酒深人自勸
良霄高會此何時當杯不醉將遺恨吾聞水者魚所依

以酒澆之良已非如何酒輟令心悲如魚得水今望誰
魚乎魚乎使我思

荔枝酒

惠州王子千使君席上咏

天爲美祿供禋祀上有旗星下有泉旣作神農能播種
更教儀狄爲開先五齊三事經曾著百榼千鍾古有傳
西土蒲萄長引蔓南州叢桂每參天豈知嶺外離支樹
植自羅浮賣酒田萬斛如珠空自照千谿如火未曾燃
羣來野雀休能網飽噉行人不論錢採下忽看花滿地
釀成何啻酒如川三年始醒誰能試百步聞香足自前
滿碗盛來無見底一觴浮出月如弦冰從化水參差減

玉旣成漿性未遷桂郡酒官應爲此越佗貢物罔聞焉
生時多食猶能醉釀後餘甘倍可憐通神益智功如在
美色怡顏力更全妃子紅塵何乃拙魏文石蜜想當然
瓊蘇爲泛觴王子元碧會開宴列仙古昔未分優與劣
眼前唯辨聖爲賢合尊豈但醉三二一斗何須價十千
多釀不憂民食耗屢豐爲愛酒鑪眠風流太守須酣飲
知借南中尙幾年

香蕉

嶺北芭蕉樹雖多不著花嶺南花且實香者在龍牙
瘦似篁初笋纖如月一彎青皮開白肉香在齒牙間

衆香多以氣鼻聞口不知香蕉香在味入酒也相宜

風乾萍果

惠州王子千使君席上作

曾郵萍果自京畿布裏綿裝馬上飛今日相逢無一似
暗香餘韻尙依稀

細切風乾遠寄將緘封間說自高堂使君正醉羅浮酒
不免樽前憶故鄉

白雲泉

客有清秋約泉來第一峯澗中分夜月鑪裏沸風松淡
發茶香遠寒消酒力濃尋源知不近明日更扶筇

題畫菊

萬蕊猶含雨露功
葉邊微帶拒霜紅
柴桑去後無知己
零落寒枝傲雪風

題呂仙像

長髯如戟酒顏紅
脫却麻鞋好御風
曾記鶴樓碑上見
簫聲多在洞庭中

題畫蓮花

誰寫芙蓉望儼然
清香雖未能殊妍
真花開落纔三日
一紙長存定百年
幾葉濃濃帶淺黃
一枝高揭露珠房
生從極樂蓮池上
開向華山玉井傍

蝴蝶花

名花迴與衆芳殊
刀剪成叢綠似蒲
朱點斑斕沾弱翅
露光濃艷上輕鬚
難尋鳥足爲胥葉
莫寫開元插鬢圖
葛令井邊多伴侶
每來枝上錯相呼

馬纓丹花

火珠瓊樹可誰栽
經月窓前色未頽
高萼併將輕瓣出
百心叢作一花開
朝纓欲請何須惜
路馬如過不用猜
赤汗龍媒今已矣
西風紅遍粵王臺

金鳳花

竹實離離未可招人間
何處有簫韶暫爲赤幟迎炎帝

忽現奇花立絳霄金羽兩行承燕頤珠光幾點綴鷄翹
南中鳳德無衰日不必貞松獨後凋

水仙花

香滿東風莫可尋一枝空見玉和金不階尺土神偏王
獨立微波韻亦深何處杯盤猶獻舞誰家海外更投簪
伯牙不作成連往留得新聲入素琴

夜落金錢花

孔方隨處可稱神萬點輕圓艷且勻天地爲爐聞自古
春王行令鑄來新時依落月堆閒砌每借狂風送近鄰
却爲上林輪不入眼前都作四知人

錦屏風

蒙茸偏得惠風吹不是花奇葉自奇
滿架錦雲浮紫蕊
一屏春色綻青絲
竹來小徑光先到
客近疎籬主自知
若比海棠差有幸
當年曾入杜陵詩

剪秋羅花

裁成天地道空高
品物流形亦太勞
小疊紅牙開野萼
十分文彩付溪毛
仙人霞帔何煩染
織女機絲不待繅
莫謂化工無快剪
西風吹面利于刀

玉簪花

亭亭直上更橫垂
三尺青莖玉一枝
作態便於奇瘦處

動人多在未開時附蟬冠薄難爲贈墮馬粧殘欲寄誰
不有淳于能人斗遺簪滿地亦奚爲

胭脂花

非藤非樹漫成窠對節方莖用若何茉莉叢低推特艷
石榴紅綴正相和纏綿懶蕊珠鬚短澹薄微香粉汗過
不用浪誇顏色好焉支山下漢兒多

木筆花

北人以玉蘭爲木筆古詩所謂木蘭舟者其樹也

古今爲夢詫文通木德由來盛在東獨抱浚香殘雪後
力持高格百花中身堪舟楫材宜老玉擬形容琢未工
羲畫以來無可寫閒閒落自春風

夾竹桃花

傲骨雄心豈易消爲花不逐歲時凋入林高士能同醉
前度劉郎尙可招色映朱欄添个个聲兼紅雨共蕭蕭
他年更有天台約短杖相尋過石橋

並蒂蓮花爲陸桂平蒼巖賦

花隨車雨發重重況是爰州秀所鍾天外遠峯明二華
斗間神劍合雙龍孤標直幹心無異並照晴波色各濃
正好移栽向丹闕洛陽宮殿號芙蓉

題畫竹

水墨饒生氣篋笊亦自風未能三尺節聲入八音中

題蝴蝶圖

南華曾作夢中人又向羅浮現化身七洞仙花時滿地
何心更憶杏園春

題畫

澹墨圖來似有聲綠天蕭寂氣如冰仙人綽約居姑射
吸露食風本自能

兩樹蒼松插碧天一間亭子瀑流邊攜琴策杖將何去
行到山亭是幾年

上弦月

暮見中天月幽人思幾重池如開半壁光漸遠西峯候

滿疑珠蚌銜幽笑燭龍乘時知進德鑒影惜頽容

時集
端州

學宮

下弦月

半暈猶明夜東林獨出遲雖升人定後得見日高時爲
直常宜損持盈豈若虧清光能復爾未許醉人知

獨漉堂詩集卷十五

羅浮陳恭尹字元孝

詩餘

了蘭 調南鄉子

玉樹便生枝豈有清香得似伊
一箭高標凌架白多岐
欲寄同心與阿誰
密葉劍相持根鈍先須避
蚓泥開落谷中何不可知
希未得宣尼譜入詩

素馨 前調

廢苑綠蕪平何物佳人尙有塋
采得濃香歸几硯零星
四座都教酒氣醒
好手結爲燈萬顆珍珠貫
綵繩入

夜花開光瑩徹鏤冰人在瑤臺十二層

榕陰

前調

千尺聳高旻絕頂垂鬚旋作根翠鬣蒼虬盤一樹嶙峋
似與菩提是弟兄何處有惹雲此地清涼獨見君三
伏蒸爰全不到細繡雨氣蟬聲日夜聞

荔枝

前調

赤帝煉丹成戲把朱砂裹水晶夏至鳳頭連黑葉筐傾
飽後廚烟不用興晚熟是增城小核新州亦得名不
及凝冰和掛綠香清入口輕鬆脆有聲

莞香

前調

緊閉小牕眠一注新添雨後天最愛香來烟不起輕煎
隔火須磨玉作錢老樹石樓邊歲鑿香牙幾百年上
品黑紋如馬尾三尖小女深藏入繡奩

莞香以有馬尾
線紋及鑿口尖

斜者爲
老樹

玳管

前調

幸脫四靈名

玳瑁大龜也

却被移封入管城終老腐儒孤掌

上冰兢寂寂相依到五更

表裏極虛明毫末兼邀顧

兔榮便有筆花生夜夢何成才盡江淹累始輕

籐簞

前調

七尺滿空牀所謂伊人水一方我欲溯洄唯夢裏蒙莊

化蝶飛飛過短牆 細織字成行斷續藤絲萬尺長長
夏蕭然無一事黃梁大嚼屠門且一場

葵扇 前調

萬樹綠撐天多在黃雲紫水邊 葵出新會 誰結輕絲裁作月
團團買得清風不用錢 聲價頓能添安石風流久不
傳寂寞空齋誰是伴翩翩荷葉香來亦偶然

蕉衫 前調

絳綌世間饒細葛雖輕不若蕉猶帶西牕前度雨瀟瀟
溽暑逢之氣自消 價賤倍無聊只售溪翁與野樵不
到貴人身上着悠悠且伴魚竿坐板橋

巖硯 前調

開匣氣先寒巧匠曾穿水底山三洞伏龍肝髓露斑斑
蕉白花青隱見間隨處列文壇縱是英雄避筆端莫
笑此身磨涅久看看滴水能興萬古瀾

祝汪芾斯鹽司 調天仙子

放雀亭邊花似綺雁翅城中人繡豸霜蹄千里綰雙符
門如市心如水他日和羹還若此況復清和風氣美
綠樹陰中紅荔子一聲鐵笛海門開天無際波無際圓
月年年天外起

寄祝陳毅菴韶州

江上報新秋日日芙蓉醉遙望芙蓉古驛尺書非易溪
山雖隔却有仁風至億萬口總同聲歌廉吏 春花發
日握手城西寺信道雄才卓識近今無二地分南北共
是重華裔千年調萬壽厄聊相寄

送錢紫華

調減字木蘭花

黃梅過了滿村荔枝紅尙小何事迴舟兩岸榴花客不
留 京華此去放棹長江知不暑相見秋風雞聲人跡
月明中

咏紅芭蕉

調傳言玉女

何處高霞映我疎籬茅屋卷簾深坐見一天新綠東風

着意葉底深紅相續層層吐焰重重苞束。火樹珊瑚
怎似他閒草木丹心無限化作光明燭山榛隔荅想見
其人空谷可憐今古同然蕉鹿

爲高固齋題蝴蝶硯

調蝴蝶兒

是地靈是天成一卷分兩儀形於中含列星鳳子文堪
擬仙衣翅並輕其閒着個老莊生夢回初著經

爲張桐君壽

調鳳銜杯

今年春比去年遲過花朝桃蕊初飛誰是詠諧方朔小
偷兒羅浮上有瑤池鸞舞綵鳳銜卮醉東風豪邁多
姿猶似賦詩橫槊少年時只是鬢邊絲

送王孝揚將軍內擢 調換巢鳳

天上宣麻正鶯遷嫩柳雁度晴花曉星移上將邊月轉
高牙漢壇鄭重勝隄沙羨公此行爲霖帝家獨堪歎窮
措大知希和寡 倚馬才如瀉黃菊仙舟對酒承揮洒
金玉清音龍蛇妙畫俱足橫行天下伏櫪驊騮不住嘶
換巢鸞鳳將飛也五羊城千萬人淚珠盈把

送梁藥亭北上 調步蟾宮

西江雪後浮仙舫正數點梅花初放八千里外片帆飛
不辜負桃花春浪 風流好副東山望須知道老當益
壯蟾宮會折一枝歸青天路有人推上

用黃頭郎事
謂青軻也

題沈上引真 調碧牡丹

觀面如曾識據檀几揮鸞翻傲岸風流道是休文標格
坦腹便便問此中何得是赤松是黃石 名甚藉莫道
烟霞癖曾侍天顏咫尺只爲多才掩却英雄本色赤面
虬鬚彷彿扶餘客東南酒何時漉

題百鹿圖爲郭宿齋從化 調千秋歲引

瑞應傳圖搖光散彩角上懷瓊向千載瑤池曾奉玉環
來王庭昔並吹笙會得其名得其壽神明宰 家有著
書傳曠代美政今時誰是對錦舞膝前萊子綵九如祝
處日初升高才捷足今斯在萬斯年百斯祿遙相待

閏七夕

調鵲橋仙

月當大火

是夕月在心宿

日重七七又道女牛相聚人間天上

厯參差却恐道佳期有悞

七針綵縷千家香粉乞巧

終然無路倘無風浪似銀河正不妨一年兩渡

瓶花

調寄洞仙歌

疎放細蕊正春光初度採遍東風幾千樹插瓶中本是
無意相依依不厭恰似良朋歡聚 清泉沾漑足簾幙
濃垂只有異香來旦暮試問此誰家黃面瞿曇微笑後
天花如雨那知道光華掩不能却早向江郎筆鋒先吐

緋桃

調寄醉春風

絳袖翩然胭脂凝尙膩倚風如共路人言是是是王母
池邊武陵溪口依希曾記含笑姿多媚帶雨濃如醉
春光九十競繁華未未未嫩綠叢中碧紗牕外一枝纔
試

碧桃 調寄羅敷媚

華林園裏連天種玉雪肌膚何必元都綽約神人在藐
姑投桃合是瓊瑤報仙木偏殊心在冰壺脂粉看來
總是汗

竹葉符 調木蘭花慢

似西天梵字貝多葉倩誰翻是倉頡禽書岫嶺蟲篆高

絕誰捫琅玕洞天福地微風起吹落遍林根却向枝頭
更覓偏尋枉費晨昏難言湘水紀啼痕上苑識公孫
覺世間變態輸伊仙蹟鳳翥龍蟠難緩鮑公丹籙與銅
符左右映朱轡擬學兒童竹馬相從一問泉源

五色鳥

調寄水龍吟

人間何處堪棲託身自是蓬萊島朱衣翠袖嫩黃淺碧
參差難考初日林中微風谷口和鳴清好看綿蠻鶯羽
呢喃燕剪聲並色都輸了曾向山靈默禱忽飛來後
先羣繞山僧謂我異人游此禽先曉一事無成千秋難
企白頭偏早欲題書問取時無青鳥鶯鳩笑倒

啞虎 前調

宵來萬籟刁調阿誰清
嘯風生苑仙都仁獸爪牙空利
肝腸偏善夜目如燈斑毛如刺
不驚林犬但泥沙路上
童兒笑指蹄痕處看淡淡
浪說騶虞不踐草青青
經行何損霽威勿用忍饑忘食
古今應鮮負子宏農乳兒
荆楚化機潛轉待龍從九五
氣求聲應大人利見

寄送惠州韶州太守 調摸魚兒

乍東風滿江絲雨浪花飛
濕蘭漿三城是處芳菲遍
新綠嫩紅爭長誰共賞
眠故里雷聲緊傍山樓響
深杯在掌念高會羣賢風流
太守詩酒競豪爽
笙歌歇更送

明朝畫舫溪山分路而往羅浮韶石時曾到白首夢魂
猶想青箬笠黃蠟屐過睂幾節枯藤杖還能勉強奈南
浦雲飛西疇春及一葦歎河廣

送王礎塵之惠州

調寄白苧

未曾行算歸日征途匪遠胸懷弗惡只是顛毛堪歎記
從前幾番沉醉別江岸精悍目如星鬚似漆雄姿顧盼
天公多事都把冰霜暗換去來間百年屈指過多半
鈍漢舍易求難逆流撐浪空使剛腸寸斷欲觀日羅浮
何時始旦平生熱淚向雲霄一洒作天花散洞號朱明
井有丹砂仙跡堪按且待秋風與子登臨看